

Чинопоследование молебна с акафистом великомученику и победоносцу Георгию

Священник: "Благословен Бог наш..."

Чтец: "Аминь".

Диакон: "Бог Господь и явился нам, благословен Грядый во имя

Господне.

Стих 1 Исповедайтесь Господеви, яко благ, яко в век милость Его.

Стих 2 Обышедше обыдоша мя и именем Господним противляхся им.

Стих 3 Не умру, но жив буду и повем дела Господня.

Стих 4 Камень, Егоже небрегоша зиждуции, Сей бысть во главу угла, от Господа бысть Сей и есть дивен во очесех наших."

Хор: "Бог Господь и явился нам..." во глас тропаря святого (глас 4).

Тропарь, глас 4

Яко пленных свободитель / и нищих защититель, / немощствующих врач, / православных поборниче, / победоносче великомучениче Георгие, / моли Христа Бога / спастися душам нашим.

Запевы(трижды):

Духовенство: **Святой великомучениче Георгие, моли Бога о нас.**

Хор: **Святой великомучениче Георгие, моли Бога о нас.**

Духовенство: **Слава:**

Хор: **И ныне:**

Кондак 1

Взбранному воеводе и Победоносцу Георгию составим похвалу, яко ходатаю нашему и скорому помощнику: ты же, святой великомучениче, яко имеяй дерзновение ко Господу, от всяких нас бед свободи, да зовем ти:

Радуйся, Георгие, великий Победоносче.

Икос 1

Ангелов Творец и всея твари Содетель, явивый тя Церкви Своей веры поборника и за веру непобедимаго стратотерпца, внушает нам за подвиги страданий твоих восхваляти тя, святе Георгие, сиче:

Радуйся, до конца Иисуса Сына Божия возлюбивый; радуйся, за имя Его с любовию душу свою положивый.

Радуйся, исповедниче, от Бога призванный; радуйся, подвижниче, Божию благодатию прославленный.

Радуйся, Ангелов сожителю; радуйся, пророков равностоятелю.

Радуйся, Георгие, великий Победоносче.

Кондак 2

Видя гонение нечестивых на христиане, не убоился еси козни их и мучительства, богомудре, но яко добрый воин Христов, вся своя нищим раздав, волею потекл еси на совет их неправедный, Христу вождю и Богу своему поя: Аллилуиа.

Икос 2

Разумно уразумев Единого Бога, в Трех Ипостасех боголепно покланяемаго, твердым умом исповедал еси Его на соборищи нечестивых и тако обличил еси безумнаго царя безумное поклонение твари. Сего ради за твое высокое любомудрие приими от нас, Георгие, усердныя похвалы:

Радуйся, Единого истиннаго Бога проповедниче; радуйся, Пресвятая Троицы верный защитниче.

Радуйся, велию православнаго исповедания тайну неверным показавый; радуйся, идольскаго служения прелесть обличивый.

Радуйся, риторе Божий; радуйся, витие, премудрости исполненный.

Радуйся, Георгие, великий Победоносче.

Кондак 3

Сила Божия, просвещающая всякаго человека, грядущаго в мир, и в темнице тя страждущаго посетила есть, смиренномудре Георгие: понеже ты вся жития сего тленная, яко уметы презрев, единому Христу прилепился еси, да за имя Его добре воинствовав, сподобишися Тому со Ангелы вечно воспевати: Аллилуиа.

Икос 3

Имея ум и сердце, Духом Святым озаренная, ты по внушению Его поревновал еси подвизатися за имя Христово, до крове стоя бо мужественно в вере, обличил еси вознесенную нечестиваго соборища гордыню. Сего ради хвалим тя, всемудре Георгие, сице:

Радуйся, щите, воздвигнутый на охранение благочестия; радуйся, мечу, подъятый на посечение нечестия.

Радуйся, столпе веры; радуйся, стено и утверждение Христовы Церкви.

Радуйся, верных удобрение; радуйся, неверных страх и посрамление.

Радуйся, Георгие, великий Победоносче.

Кондак 4

Безумный мучитель, дышащий на тя убийством, страстотерпче Георгие, жаждал бо крове твоя, яко пес алчный, повелевая распяти на колесе тело твое и злейшим мукам предати; ты же, возмогая о Господе, с твердым упованием к Богу взывал еси: Аллилуиа.

Икос 4

Слышавше от тебе Диоклетиан и жрецы идольстии словеса премудрости, распыхахуся на тя злобою, паче же егда рекл еси: «О царю мучителю! Почто мя всеу истязуеши? Мне бо еже жити, Христос, и еже умерети, приобретение.

Трудно ти есть противу рожна прати». Сего ради мы взываем ти, великоимените Георгие, сице:

Радуйся, за мужественное исповедание веры на колесе кровь свою пролиывый; радуйся, кровию своею торжество веры возвеличивый.

Радуйся, Апостолов соревнителю; радуйся, вольным Христовым Страстем подражателю.

Радуйся, поборниче веры непоколебимый; радуйся, страсотерпче, адаманта твердейший.

Радуйся, Георгие, великий Победоносче.

Кондак 5

Боготечной звезде подобен был еси Георгие, чудесным бо от Ангела исцелением и видимым от колеса отрешением научил еси неверных веровати в Троицу Единосущную и Той купно с тобою воспевати: Аллилуиа.

Икос 5

Видеша народи чудеса силы Божия, яве на тебе бываемыя, с кротостию учение Христово от тебе прияша и возопиша, глаголюще: «Воистину велик Бог христианский!» Сего ради и мы, восхваляя тя, достославне Георгие, взываем сице:

Радуйся, светоносным спасения словом тьму неверия разгнавый; радуйся, мученическим веры исповеданием неверныя ко Христу обративый.

Радуйся, легионы воинов земных в небесное воинство предводяй; радуйся, яко воин Христов с небесными вои пребываяй.

Радуйся, ратоборцев славо; радуйся, пресветлаго мученическаго лика красото.

Радуйся, Георгие, великий Победоносче.

Кондак 6

Проповедником истины, духоносным Апостолом поревновав, крестом миру распялся еси, страсотерпче; се бо, яко Иона во чрево китово, в пещь нерастворенныя извести стремглав ввержен был еси, да прославится тебе ради дивный во святых Господь, Емуже ты и в рове известнем, яко во храме славы, умно взывал еси: Аллилуиа.

Икос 6

Возсиявый в тридневном Своем от гроба востании всеильный ада и смерти Победитель Иисус спасе тя от адова исления, страсотерпче Георгие: по триех бо днех обретоша тя в извести жива и в воздеянии рук поюща Бога; сего ради вельми пристрашни быша и ужасошася. Мы же, радующеся, восписуем ти победную песнь:

Радуйся, позорным в известный ров низвержением, вознесенную диавола гордыню низложивый; радуйся, дивным от Бога спасением зверство мучителей победивый.

Радуйся, яко незлобив сый, за творивших ти напасть молился еси, яко за благодетельцев; радуйся, яко о обращении их, яко же Павел о евреех, болезновал еси.

Радуйся, мужу желаний; радуйся, сосуде избранный.
Радуйся, Георгие, великий Победоносче.

Кондак 7

Хотяй всячески уловити сердце твое к прелести идол, нечестивый мучитель умышляет прельстити тя волшебными чарованиями; ты же, богоизбранне, с Давидом восклицаая: «О Боже спасение мое и слава моя», верно Тому пел еси: Аллилуиа.

Икос 7

Новое показа зло лукавый оный сатаны служитель Диоклетиан, егда в безумной своей ко идолом ревности повеле напоити тя, Георгие, ядом; ты же исполнен сый веры и упования, аще и смертное испил, обаче без вреда пребыл еси, богохвальне, темже и мы вопием ти:

Радуйся, яко во уповании на Бога Жива не посрамился еси; радуйся, яко мучителя ни во чтоже вменил еси.

Радуйся, бесов отгнателью; радуйся, волшебных козни разрушителю.

Радуйся, яко тобою дивен Бог во святых Своих является; радуйся, яко тобою благочестно имя Христово прославляется.

Радуйся, Георгие, великий Победоносче.

Кондак 8

Странный и страшный совет бысть от некоего волхва нечестивому царю, да повелит ти, в доказательство правости веры Христовой, словом воскресити мертвого; ты же, Георгие, ничтоже сумняся, воспевал еси Тому, Иже несть Бог мертвых, но Бог живых: Аллилуиа.

Икос 8

Всежеланный и Сладчайший Иисус, Егоже ты всею душею и всем сердцем возлюбил еси, всеблаженне Георгие, слыша теплое веры твоя моление, вскоре повеле по слову твоему воскреснути мертвому, прославления ради Имени Своего и верных утверждения, неверным же и ослепленным на удивление и богопознание. Сего ради по долгу вопием ти:

Радуйся, яко Господь сил дивная на тебе явил есть; радуйся, яко мертвого тобою от гроба воскресил есть.

Радуйся, ослепленному волхву умное прозрение веры даровавый; радуйся, многим, Христа ради пострадавшим, во святая святых путь показавый.

Радуйся, Рима удивление; радуйся, христианскаго рода возвышение.

Радуйся, Георгие, великий Победоносче.

Кондак 9

Вси Ангели восхвалиша Бога, даровавшего ти таковое мужество, Георгие, яко и в темничном заточении не преставал еси молитвенно бодрствовать. Сего ради, яко великий таиник Божия благодати, удостоился еси видети в видении Господа, венцем нетления главу твою венчающа, да и мы с тобою вопием: Аллилуиа.

Икос 9

Витии многовещаннии риторскими своими языки не возмогут изрещи тебе достойныя хвалы, Георгие, многих ради твоих подвигов и болезней, ихже за Христа и Церковь подъял еси волею. Сего ради и мы, недоумя восхваляти тя по достоянию, воспеваем сице:

Радуйся, вольным за Христа и Церковь страданием ветхаго в себе Адама распявый; радуйся, за доблестное страдание венец правды от руки Господни приявый.

Радуйся, правило ревности благочестивыя; радуйся, образе нищеты духовныя.

Радуйся, яко не себе, но Единому Богу добре угодил еси; радуйся, яко за Христа на многообразныя смерти готов был еси.

Радуйся, Георгие, великий Победоносче.

Кондак 10

Спаси хотя души во тьме идолослужения погибающих, боголюбче Георгие, ты, ревнуя, поревновал еси, яко Илия по Бозе: вшед бо во храм идольский, силою Божию разгнал еси бесы, сокрушил идолы, посрамил жрецы и, яко победитель, не с человеки, но со Ангелы пел еси Богу: Аллилуиа.

Икос 10

Стены бесчувственнее окамененный сердцем мучитель твой, Георгие, не уразуме Бога, яве тобою чудодействующа, но до конца пребыл еси, яко аспид, затыкаяй уши свои. Сего ради повеле усещи тя на позорищи во главу, яко злодея; ты же, болезнуя о погибели души его, радостно приял еси кончину, за нюже мы тя ублажаем любовью сице:

Радуйся, веру, надежду и любви до конца сохранивый; радуйся, во успении твоём многия и великия чудеса сотворивый.

Радуйся, оружием благоволения Божия венчанный на земли; радуйся, славою и велелепием украшенный на Небеси.

Радуйся, человеце Божий; радуйся, добрый воине Христов.

Радуйся, Георгие, великий Победоносче.

Кондак 11

Пение Пресвятей Троице паче иных воздал еси, святой великомучениче Георгие, не словом точию и умом, но живым всего себя в жертву принесением: подражая бо распятому за ны непорочному Агнцу Христу, положил еси душу свою за други своя волею. Темже убо аще недовольни есмы к похвалению таковыя твоея доблести, больше бо сея любви никтоже имать, обаче благодарни суще, поем Дивному во святых: Аллилуиа.

Икос 11

Светоприемный светильник истиннаго Света сущим на земли являешия, богоизбранне Георгие, просвещаеши бо сердца верных и к разуму Божественному вся наставляеши, поучая и нас весело зывати:

Радуйся, яко в пресветлых ангельских чертозех вселяешия; радуйся, яко не в гадании, но лицом к лицу, Невечерняго Троичнаго Света причащаешия.

Радуйся, нищих питателю и обидимых защитниче; радуйся, немощных врачу и царей поборниче.

Радуйся, православным воином во бранех споборниче; радуйся, о спасении грешников теплый ходатаю.

Радуйся, Георгие, великий Победоносче.

Кондак 12

Благодать, данную ти от Бога, ведуще, память твою празднуем, великомучениче Георгие, и с усердным молением к чудотворному образу твоему притекающе, твоею всесильною о Господе помощью, яко неборимую стеною, ограждаемся. Сего ради восхваляя тя, усердно зовем Богу: Аллилуиа.

Икос 12

Славную кончину твою поюще, еюже возвеличился еси, яко добрый воин Христов, молим тя, страстотерпче Георгие: буди нам во всем ко благу помощниче и услыши ны, усердно взывающих ти:

Радуйся, яко тобою Церковь верных просвещается; радуйся, яко имя твое и между неверными прославляется.

Радуйся, дивная исповедников славо; радуйся, высокая мучеников похвало.

Радуйся, телес наших целебниче; радуйся, о душах наших молитвенниче.

Радуйся, Георгие, великий Победоносче.

Кондак 13 (трижды)

О всеблаженный и святой великомучениче Георгие, прими сие наше хвалебное пение и избави нас от всякаго зла твоим теплым к Богу ходатайством, да с тобою воспоем: Аллилуиа.

Икос 1

Ангелов Творец и всея твари Содетель, явивый тя Церкви Своей веры поборника и за веру непобедимаго страстотерпца, внушает нам за подвиги страданий твоих восхваляти тя, святе Георгие, сиче:

Радуйся, до конца Иисуса Сына Божия возлюбивый; радуйся, за имя Его с любовию душу свою положивый.

Радуйся, исповедниче, от Бога призванный; радуйся, подвижниче, Божию благодатию прославленный.

Радуйся, Ангелов сожителю; радуйся, пророков равностоятелю.

Радуйся, Георгие, великий Победоносче.

Кондак 1

Взбранному воеводе и Победоносцу Георгию составим похвалу, яко ходатаю нашему и скорому помощнику: ты же, святой великомучениче, яко имеяй дерзновение ко Господу, от всяких нас бед свободи, да зовем ти:

Радуйся, Георгие, великий Победоносче.

Диакон: **"Вонмем! Премудрость! Вонмем!"**

Прокимен, глас 4: Праведник яко финикс процветет / и яко кедр иже в Ливане умножится.

Стих: Насаждени в дому Господни, во дворех Бога нашего процветут.

Диакон: **"Господу помолимся"**

Хор: **"Господи, помилуй".**

Священник: Возглас: **"Яко Свят еси, Боже наш..."**

Хор: **"Аминь".**

Диакон: **" Всякое дыхание / да хвалит Господа.**

Стих: Хвалите Бога во святых Его, хвалите Его в утверждении силы Его.

(в приходской практике часто опускается).

Хор: **"Всякое дыхание да хвалит Господа"** 2,5 раза.

Диакон: "И о сподобитися нам слышанию Святаго Евангелия Господа Бога молим".

Хор: **"Господи, помилуй" (3).**

Диакон: **"Премудрость, прости! Услышим Святаго Евангелия".**

Священник: **"Мир всем!"**

Хор: **"И духови твоему".**

Священник: **"От Луки Святаго Евангелия чтение".**

Хор: **"Слава Тебе, Господи, слава Тебе".**

Диакон: **"Вонмем!".**

Священник: читает Евангельское чтение (Лк., зач. 63).

Речё Господь: ничтоже покровено есть, еже не открыется, и тайно, еже не разумется. Зане, елика во тме ресте, во свете услышится, и еже ко уху глаголасте во храмех, проповестся на кровех. Глаголю же вам другом Своим: не убойтеся от убивающих тело и потом не могущих лишше что сотворити. Сказую же вам, кого убойтеся, убойтеся имущаго власть по убиению в оврещи в дебрь огненную, ей, глаголю вам, того убойтеся. Не пять ли птиц ценится пениязема двема? И ни едина от них несть забвена пред Богом. Но и власи главы вашае вси изочтени суть. Не убойтеся убо, мнозех птиц унши есте вы. Глаголю же вам: всяк, иже аще исповесть Мя пред человеки, и Сын Человеческий исповесть его пред Ангелы Божиими, а отвергыйся Мене пред человеки отвержен будет пред Ангелы Божиими. И всяк иже речет слово на Сына Человеческаго, оставится ему, а на Святаго Духа хулившему не оставится. Егда же приведут вы на соборища и власти и владычества, не пецытеся, како или что отвещаете, или что речете, Святыи бо Дух научит вы в той час, яже подобает рещи.

Хор: **"Слава Тебе, Господи, слава Тебе".**

Диакон: Сугубая ектения (сокращенная): **"Помилуй нас. Боже, по велицей милости Твоей, молим Ти ся, услыши и помилуй.**

Хор: **Господи, помилуй. (Трижды, на каждое прошение.)**

Еще молимся о Великом Господине и Отце нашем Святейшем Патриарсе Кирилле, и о Господине нашем Высокопреосвященнейшем митрополите Ювеналии, и всей во Христе братии нашей.

Еще молимся о Богохранимем стране нашей, властех и воинстве ея, да тихое и безмолвное житие поживем во всяком благочестии и чистоте.

Еще молимся за всю братию и за вся христианы."

Священник: Возглас: **«Услыши ны Боже...»**

Хор: **"Аминь".**

Диакон: **"Ко святому великомученику и победоносцу Георгию помолимся".**

Хор: **"Святой великомучениче и победоносче Георгие, моли Бога о нас".**

Священник:

1. О всехвальный, святой великомучениче и чудотворче Георгие!

Призри на ны скорою твоею помощию, и умоли человеколюбца Бога, да не осудит нас грешных по беззакониям нашим, но да сотворит с нами по велицей своей милости.

Не презри моления нашего, но испроси нам у Христа и Бога нашего тихое и богоугодное житие, здравие же душевное и телесное, земли плодородие и во всем изобилие, и да не во зло обратим благая, даруемая нам тобою от всещедрого Бога, но во славу святого имени Его и в прославление крепкаго твоего заступления, да подаст Он всему боголюбивому воинству на супостаты одоление.

Изрядне же да оградит нас святых Ангелов своих ополчением, во еже избавитися нам, по исходе нашем из жития сего, от козней лукавого и тяжких воздушных мытарств его, и неосужденным предстати престолу Господа славы.

Услыши ны, страстотерпче Христов Георгие, и моли за ны непрестанно триипостаснаго Владыку всех Бога, да благодатию Его и человеколюбием, твоею же помощию и заступлением обрящем милость, со Ангелы и Архангелы и всеми святыми одесную правосуднаго Судии стати, и того выну славити со Отцем и Святым Духом, ныне и присно, и во веки веков, Аминь.

2. Святой, славный и всехвальный великомучениче Христов Георгие!

Собрании в храме твоём и пред иконою твоею святою поклоняющиеся людие, молим тя, известный желания нашего ходатаю, моли с нами и о нас умоляемаго от своего благоутробия Бога, да милостивно услышит нас, просящих Его благостыню, и не оставит вся наша ко спасению и житию нужная прошения, и дарует людям нашим победу на сопротивных, и паки припадающе молим тя, святой победоносче, укрепи данною тебе благодатию во бранех православное воинство, разруши силы востающих врагов, да постыдятся и посрамятся, и дерзость их да сокрушится, и да увидят, яко мы имеем Божественную помощь, и всем в скорби и обстоянии сущим

многомощное яви свое заступление, умоли Господа Бога всея твари Создателя избавити нас от вечнаго мучения, да всегда прославляем Отца, и Сына, и Святаго Духа, и твое исповедуя предстательство, ныне и присно, и во веки веков, Аминь.

Диакон: **"Премудрость! Пресвятая Богородице, спаси нас".**

Хор: **"Честнейшую херувим..."**

Священник: **"Слава Тебе, Христе Боже, упование наше, слава Тебе"**

Хор: **"Слава и ныне:", "Господи, помилуй" (3); "Благослови".**

Священник: Отпуст: **"Христос истинный Бог наш..."** .

Хор: **"Господи, помилуй" (3).**

Величание

Величим тя, страстотерпче святыи великомучениче и победоносче Георгие, и чтим честная страдания твоя, яже за Христа претерпел еси.